

明名臣言行錄

明名臣言行錄卷第八十四

經畧熊襄愍公廷弼

號芝岡湖廣江夏人萬曆戊戌進士官至兵部尚書天啓五年八月死於西市崇禎改元輔臣韓蒲州爲公訟冤許賜首身歸葬

公軀長七尺餘少髯有膂力能左右射二十九中丁酉解元戊戌成進士授保定推官以治行擢御史朝論以公有文武才特命巡按遼東時撫臣趙楫鎮臣李成梁棄新疆爲甌脫兵科宋一韓叅之勅公往勘疏報成梁棄地驅民有八可斬策其後必爲大患請覈

界飭兵更十餘年而言多不爽戊午

本朝太祖起兵於遼已未三路敗衄以廷薦起公大理  
丞隨授兵部侍郎兼副都御史代楊鎬爲經畧公上  
奏曰臣至各邊相度彼之出路有四東南爲靈陽南  
爲清河西爲撫順北爲柴河三岔兒間俱當設重兵  
而鎮江南障四衛東顧朝鮮亦不可少者此險要之  
大畧也四路首尾相護每路設兵三萬裨將十五六  
員分奇正以當一面鎮兵設兵二萬裨將七八員半  
劄義州半劄鎮江夾鴨綠江而守此聯絡之大畧也  
清河撫順三岔兒山多漫坡可騎步並進當用西北

兵以西北大將統之寬輟林箐險阻可專用川土兵以西南大將統之鎮江水路之衝當兼用南北兵將此兵將之大畧也各路領兵到邊畫地而守小警自爲堵禦大敵互相應援挑其精悍者時出以撓之此坐困而轉蹙之大畧也善行師者行必結陣止必立營貯放糧草兼作進步再設兵二萬駐遼陽以壯中堅海州設兵一萬以備後勁金復設兵一萬以杜南侵此征行居守之大畧也初出關甫至十三站而鐵嶺報失瀋陽軍民盡逃遼陽洶洶無固志公兼程行路遇逃者諭之歸城有通判劉邦浩闔宗已行公取

其衣冠襪之勒令回室又獲一戎裝女子出城者嚴  
三岔河渡河兵丁而逃者始定役屬軍士造營車火  
器濬濠增城令嚴必行一月而守始固乃進理虎皮  
驛如前法又進而理瀋陽移軍守之完廩既定乘九  
月淩雪密傳赴瀋陽合操操已卽傳赴固城遂赴撫  
順鼓吹直入一路皆被蹂躪四顧無復人跡城中惟  
存一關廟馬神廟公大哭隨行軍皆哭尋耀兵分隊  
返至奉集駐足相度形勢擬移撫順于代子河南據  
河爲險用兵三萬屯之先經理奉集謂奉集完固則  
遼陽安可徐議復開鐵矣公歸遼日夜督軍士造營

車開窑燒磚令軍士人備一大木四兵合一鑼一鍋以聽後令蓋將以間移三萬人屯築撫順南城也爲閱科姚宗文構去而以袁應泰代

公答首輔書云國初遼東官軍自食其地後屯權荒廢原額僅存無幾仰給度支八十萬撫賞十餘萬未有餘利可捐以遼守遼之說周永春李如楨劉國縉主行之而俱不効今巡撫募鄉兵一萬七千月食三兩護如驕子一遣往鎮武設防而棄甲投戈者屢屢其不得不徵調於內地者勢也三方布置未成便應議裁而歸併廣寧一路爲持久之計

初公在遼陽有奔稱回鄉者悉置之城一隅不用爲兵有賈得功自稱生員回鄉內有八歲小兒公引置署內誘以果餌具言家安然在彼中携小兒使不疑耳窮之乃知前爲開原作內應者也立磔之賀世賢以有異志公心疑之使自爲一軍備調遣不使定駐及袁應泰代任遂委任之不疑俾懸牌招降來投卽納諸帥童仲揆泣諫應泰曰我自收不戰之功監軍高出固諍亦不聽曰我固欲空其巢耳令世賢與尤世功並駐瀋陽世功所將一萬五千人世賢報納降丁六萬世功密啓應泰曰世賢所報六萬實十萬也城

決不可守願以所統卒自歸遼陽應泰乃始大駭然  
已無可柰何矣四閱月而遼陽亡

遼陽報至舉朝震恐上諭吏部曰熊廷弼守遼一載未  
有大失換過袁應泰一敗塗地當時倡議何人若不  
嚴核何以警後部覆議上諭曰馮三元張修德魏應  
嘉扶同排擠致誤封疆各降三級調外姚宗文陰險  
傾陷實爲禍始革職爲民起公爲尚書仍經畧命撫  
按敦趨就道刻期視事時首輔葉向高被召未至皆  
次輔南昌劉一燝主議也有間劉於葉者謂欲阻其  
入朝向高信之而給事霍維華孫杰皆葉之門人也



方以通內事爲冢宰周嘉謨所惡例轉外藩遂鼓其黨與新遼撫王化貞比爭獻諛福清曰麟閣功勲可唾手以待老師不使南昌獨有其功名於是福清入而南昌不安其位南昌去而經撫之袒分舉朝終日聚訟卒至併送河西且起朋黨之獄盡以大權歸之中璫矣

公旣拜命赴召特賜尚方劍得便宜行事又令九卿祖餞都門外以寵其行比出關大司馬張鶴鳴復設餞三十里外冀有所私公岸然曰今日且不必言邊事鶴鳴由此恨之

時王化貞以巡撫駐廣寧上令公守開化貞主戰欲用  
西制東而密招叛將爲內應公欲阻險畫關而守議  
旣相左臺省各以意見佐之遂成水火交章構爭不  
已於是諭兵部集羣臣會議經撫去留言人人殊卽  
政府亦爲兩可之言不能斷決也

熊王同事兩不相能王信叛將之間望其內應熊遺書  
云於彼則家當已重殊無出理於我則罪業已深殊  
無還理兩言頗爲破的王不之省以至於敗

又連章累牘力陳玩師必敗奸細當防降情叵測人心  
不固莫有聽者而本兵張鶴鳴袒撫撤經畧標下精

兵六千與化貞進戰辛酉冬化貞銳意進兵壬戌正月公急整兵赴援而敗信至矣時大兵尚未至鎮武化貞已棄廣寧而逃西至閭陽向公大哭公顧笑曰六萬蕩平竟何如化貞慚議守寧前公曰晚矣公不受給募戰不撤廣寧兵於振武當無今日此時冰潰之勢誰與爲守惟有護難民入關勿以資敵足矣乃整衆西行詎公入而化貞亦入河西陷矣言者並以私逃論列奉旨逮化貞革公職聽勘公亦自詣法司咸謂公奉守關之旨不可謂逃又不當與化貞同律已而法司會審俱坐以大辟上命三司問公曰廣寧

可復否公曰可復則不失又問何以不可復公曰以平章如是之主張以樞部如是之調遣以經撫如是之區畧以臺省如是之議論一時廷臣爭欲殺公在獄四年會楊忠烈二十四罪疏上黨人謂出公手時有公部下蔣應陽者於觀音經後有圖識數語諜者得之坐妖言棄市越三日四鼓中貴捧駕帖至公洗沐整冠曰我大臣也死當拜旨豈容草草手持一疏提牢主事張時雍謂囚何得上書公曰此趙高之言也盛世安得有此從容就戮傳首九邊賦絕命詞可惜復可惜報國心寸赤幾度事戎行九死衽金革甘

苦同士伍朝夕紅抹額扼固倚金湯師行過枕席敢  
謂詩書帥勞苦著疆場雖無衛霍奇遁聲迹掃

蕩直需時佇銘瀚海石人事一朝變頓成芻狗春繁  
尾先駑駘縛手責賁獲弟子匪師貞丈人空咄嗟遂  
敗乃公事豈少胸中畫繁獨余數奇實惟國家厄何  
圖遘難來凶熒轉迸迫爲法旣受惡肆毒仍誣逆蜚  
語紛流煽長安競大索根株相批連法吏徒擣捩蒼  
蒼天蓋高微誠何由格萬憤結中懷塞兌坐焚炙我  
心已死灰我肉已枯腊我燐騰火青我血化水碧月  
冷烏啞啞墻危樹撼撼孤魂依故骸羣蠅作平客嗚

呼竟已矣惜此身九尺嶽嶽高岡松矯矯秋旻翮目  
炯電光熒氣轟巨靈擘衝口倒峽流信手奏刀砉左  
握靈虵珠右搦雍狐戟顛倒羣策奔叱咤千夫辟文  
武而風裁往蹇資來碩迷途馬不違前籌箸可借只  
今赤白囊晝夜飛羽驛婦人寇赤幘將軍服巾幘水  
師本兒戲火攻亦下策援枹思鷹揚舍我其誰適試  
叩囊底餘猶令云何剪敵忌甘心快毒螫長

城萬里壞將星中壘圻不念以君父憂何釋他

日儻拊髀安得起死魄絕筆嘆可惜一歎天地白  
高汝拭曰廷弼任事纔十餘月遼左之頽城如新喪胆

之人心復定至奉集瀋陽二空城儼然重鎮伊誰力也童蒙入遼官民士庶遮道而代之鳴謂數萬生靈皆廷弼一人所留其功不小第其性甚急刻期鳩工鄉紳青衿役無一免又細打各弁斥逐遊客是以流言載道形容過實若勝心所激屢疏肆辨幾成罵詈實乖大臣之體功在存遼罪在任性噫兩言蔽之矣崇禎朝兵科瞿式耜爲不平上疏封疆爲重彼失事者罪固無逃矣乃熊廷弼梟首西市且傳首九邊而三路喪師之楊鎬擅離信地之王化貞竟逍遙福堂甚有以化貞入薦牘者何以服廷弼之心又何以服天

下人之心乎人皆知廷弼以門戶殺非以封疆殺而究無人敢訟言之者

當熊王就讞時化貞賂市人羣詢公頌已流聞大內其冤終崇禎朝不白已巳次子兆璧鳴冤大學士韓爌揭奏始收葬

鄒氏曰公生平殆始終遼事云方公之受勅也則曰駐扎山海調度三路上之諭公也則曰嚴飭兵將控扼山海是朝廷命公之信地在山海也廣寧右屯非公信地也山海固無恙也而謂巡撫棄廣寧當死經畧棄右屯當死可乎尤可笑者不死於右屯之失而死



於妖言之條不死於經撫俱當論死之議乃先殺經

而欲活撫所云祥刑是耶非耶

其中機局詳載酌中志畧內

係蔣野抄曰獻遼東傳一事聞揆席者袖之以入貴池  
涿鹿崑山合舉也貴池雖有夙隙然實迎內意以內  
誣廷弼貽爲殺楊左諸人也不然廷弼卽有罪亦鎬  
化貞輩等耳何事急急殺之以合詞經筵爲首功耶  
論曰宋室之不競欲殺岳武穆剪敵忌以壞長城者獨  
一秦檜耳今舉朝皆檜欲求公之不死遼事之克振  
其可得乎予讀經畧奏牘未嘗不服其才悲其遇而  
恨當事之誤國臺省之構陷也噫

少師朱公燮元

字懋和號恒岳浙江山陰人萬曆壬辰進士累官  
兵部尚書

授大理評事遷寺正出爲蘇州知府轉廣東提學副使  
歸省家居十年起陝西按察使分巡隴右遷四川右  
布政天啓元年藺酋奢崇明者以宣撫司世守其土  
因奉調援遼出兵重慶乘釁殺巡撫司道等官遂以  
重慶反一呼得二十萬衆將分道寇成都時公方以  
入覲就道矣蜀王聞變率士民出城遮道留公公慨  
然以討賊自任遂反旆治兵城守二十餘日得勝兵

七千賊尋薄城下公誓衆登陴乘賊懈遣死士斫營  
多所擒斬內誅奸細外用間諜誘賊驍將來歸賊計  
如窘

今春正月賊數千自林中大噪而出視之有物如舟  
一人披髮仗劍上載羽旂中數百人名挾機弩毒矢  
牛數百頭運石轂行旁翼兩雲樓如左右廣俯視城  
中老幼婦女皆哭公曰此呂公車也破之非礮石不  
可礮石者巨木爲杆柱置軸柱間轉索運杆千鈞之  
石飛擊如彈丸賊舟不得近公復募敢死士以大砲  
擊牛中其當輓者牛駭返走乘勢縱擊敗之

裨將劉養鯤言有諸生范祖文鄒尉陷賊中遣孔之談  
來約賊將羅乾象欲自拔効用公卽遣之談復往至  
則與乾象偕來公方臥戍樓呼與飲乾象衷甲佩刀  
公不之疑就榻呼同臥酣寢達旦乾象感激誓以死  
報許之縋而出後賊營四面火起崇明父子拔營走  
乾象等皆來歸成都圍凡百有二日而解

擢公僉都御史巡撫四川專委以討賊公率大兵兼程  
追勦定敘州復重慶賊乃渡瀘水去以餉乏不及窮  
追明年三月加公兵部侍郎總督川湖陝西七月遂  
入蘭州清其巢穴拓地千餘里先是賊誑扇諸彝謂

已得成都水西安氏者與蘭接界世相仇殺宣慰司  
安位幼弱支庶安邦彥擅政聞蘭已得蜀亦欲乘間  
據黔遂反於水西二酋解仇相結互爲唇齒會黔撫  
敗沒於大方奢崇明子寅竄雄狡乘勢復擾蘭公立  
賞格購降彛授之計令密圖奢氏而自率師出遵義  
爲黔聲援

晉公兵部尚書賜尚方劍收撫貴州節制貴湖川雲廣  
五省軍務公大治兵分道並進而所遣降彛斬奢寅  
首來獻公以崇明不足慮遂專意討水西公建議滇  
兵出需益過安効良應援而別布天生橋尋甸等以

絕其走蜀兵臨畢節扼其交通四裔之路而別出龍  
場巖後以奪其險黔兵由晉定渡思臘河徑趨彥巢  
而陸廣鴨池擣其虛粵西出泗城分兵策應然後帥  
大軍由遵義鼓行而前尋以憂去未及用

崇禎二年仍起公撫貴州總督如故公受事則具陳從  
前所以坐敗之故而與之更始於是選將練兵募人  
屯種爲久駐之計而公復遍歷險隘周視形勢尋合  
滇黔蜀三方進勦而自督大軍駐六廣逼大方賊抵  
赤水公令守將佯北誘之深入至永寧大兵出其後  
奮擊賊遂大潰臨陣斬崇明邦彥餘賊及遠近諸彝

復擁安位以抗王師公度冰西山谿險阻多瘴毒難與力爭務以計困之屯兵近地焚其積窖斷其樵牧密遣人入大方燒其宮室安位大恐乞降公要以四事一貶爵一削水外六目之地歸朝廷一獻殺王巡撫者首一開畢節等驛路安位皆受命遂率土目納款公爲奏請詔許之

九年移師誅五洞叛苗益翦水西羽翼由是黔中遂安自貴陽上下六衛及楚之清平偏鎮四衛一千六百餘里皆設亭障通商旅如內地矣方蘭州初定諸將吏咸欲郡縣其地公不可惟以外四里膏壤歸永寧

衛而內四里深險磽瘠者分給降將使各守其土世  
爲藩衛及安氏之亂公旣破降之力寢郡縣之議因  
上奏言制彝之法必先固本水西自河以外六目九  
司之地已悉入版圖沿河要害臣所築城三十六所  
近控彝地遠聯滇蜀煙火相望部曲相保彝必不敢  
爲寇而諸將士身經百戰皆願得尺寸以長子孫宜  
卽新疆授之使知所勸謹條上便宜九事文多不載  
上從之

龍場壩者在蘭州水西之界二酋嘗爭此地奢氏敗水  
西假之以居會蜀人爭功欲設官屯兵以自廣公力



言不便謂內激藺彘必死之闕外挑水西扼吮之嫌  
兵端一開未易卒止讒者謂公曲庇安氏天子亦疑  
之詰責數四有旨行勘而公持議益堅及勘地界卒  
如公議

十年安位死無嗣族屬爭立朝廷又欲用兵郡縣之公  
復疏言水西有宣慰公土有各目私土公土宜歸朝  
廷私土宜畀分守乃召將吏議以爲衆建土司使其  
勢少力分則易制各欲保土地傳子孫則不致爲逆  
乃上奏曰臣案西南之境皆荒服也楊氏反播奢氏  
反藺安氏反水西而滇之定番彈丸小州爲長官司

者十有七二三十年未聞有反者非他司好逆而定  
番忠順也蓋地大者跋扈之資而勢弱者保世之策  
也今臣分水西之壤授諸渠長及有功漢人咸俾世  
守凡其俗虐政苛歛一切除之使叅用漢法可爲長  
久計制曰可西南遂底定焉

劉念臺先生誌公墓謂公沉毅如韓魏公練達如李文  
饒將畧大類趙營平誠然哉朝廷錄公功累加三少  
蔭錦衣二人戊寅卒於官天子震悼賜祭葬如禮

明名臣言行錄卷第八十四

終

明名臣言行錄卷第八十五

御史張忠烈公銓

字宇衡號見平山西沁水人萬曆甲辰進士官至  
監察御史天啓辛酉死於瀋陽之難

初授保定推官擢浙江道御史巡視茶馬以憂歸服闋  
起按江右下車問民疾苦延見藩臬諸大寮諮以吏  
治得失及部中豪不法政事所宜廢舉者時論稱之  
時東陲告倣公上言建之山川險易諸將未能悉諳且  
懸軍深入保無抄絕且突騎野戰彼之所長而我之  
所短也以短擊長以勞赴逸以客當主非計之得爲

今之計職以爲不必徵兵各省騷動天下但就近調募益以遼兵俟經畧分布屯集要害修復城堡多製火器練習行伍且以固吾圉而厚撫北關以堅其敵多行間諜以潰其黨然後用計乘隙期於一創以伸中國之威若加賦選丁騷動天下恐憂有不止遼左者不報會邊事棘廷議遣按臣非才識練達如公者不可時公臺資已十年例不當巡方公曰急病讓彛人臣事也遂攬轡而東經畧袁公應泰方受降公聞而投袂曰遼禍在此矣力爭不得

經畧以罪孥配降人公禁止曰猶是衣冠子女何忍令

其至此遽入感而泣下瀋陽之役公先下令遷降丁  
于城外賀世賢不從將士憑濠而守彼驅土填塹遂  
蜂擁過濠薄暮城頭火起城內降丁應之開東門而  
納敵瀋陽遂陷公與應泰及分守何廷魁三人坐城  
東樓公謂應泰曰坐公尸居游魂致我無成事而死  
應泰曰公無閫外責尚可退守河西泰不才當死於  
此公曰不然吾世受國恩豈有城破身存之理城陷  
應泰引刀自裁廷魁返署驅二女二妾入井而後自  
縊監軍崔儒秀都指揮徐國全並縊於都司同知肩  
日乾亦自縊公回署李游擊入見訴不得已故公曰

汝對我言我對誰言擁之出

責以拜公張目大

呼曰吾天子憲臣豈爲汝拜又謂從我則生公大怒  
曰吾義烈男子豈肯從汝何不速殺我遂令人執之  
去已又以好言慰之公終不屈一帥自外人舉刃向  
公公引頸以受忽手縮曰送汝歸何如公謂歸亦何  
顏速死爲幸帥知不能奪令輿送不就以馬送亦不  
就乃令二人強扶上馬送還署至署門對北闕八拜  
又遙望父母四拜遂自縊一軍皆歎爲忠臣棺而葬  
之事聞贈大理寺卿再贈兵部尚書予祭葬謚忠烈  
陰子錦衣衛指揮建祠曰昭忠

公形貌魁傑美髯鬚好議論喜讀書奉差著春秋補傳  
國史紀聞凜然忠義足以動天地泣鬼神矣

僉事潘節愍公宗顏

字士讚保安衛人萬曆癸丑進士官至僉事己未殉廣寧之難

爲諸生便究心時事有籌邊賦及韜畧十二對初授戶部主事聞東事日棘公上書言援遼調兵用間之計旬日凡數上不省遂挺身往督遼餉會開原道引疾去卽推公僉事往申明軍令嚴爲巡緝取淫掠者立正以法四境肅然陰知馬林不可共事未出師前遣書楊經畧曰林庸懦不堪一面之寄乞易別帥當此重任而以林遙作後應庶其有濟否則不惟悞事且



恐此身實不自保後果如其料

已未三月王師四路出杜松兵先潰於渾河公監馬林軍從靖安堡出開鐵三月朔分兵出三岔堡口翼日抵二道關大兵進薄之林提兵以去王師復潰公及蓋州通判董爾礪力戰死公嘗言用兵謹候太白戊午八月以後太白西向利先起利滾入明春太自在東則不利用兵然能知用兵之不利而不能使師之不出豈非天哉師出否臧首尾率率綸閣有催戰之檄閭外無統一之權公明知其必死而計不反顧竟與二大帥俱死嗚呼亦已難矣

叅政高忠節公邦佐

字以道山西襄陵人萬曆乙未進士官至叅政分  
巡道壬戌二月殉廣寧之難

初授壽光知縣招撫流移開墾荒土爲山東循良第一  
入爲戶部主事陞郎中出守永平時稅監高淮橫甚  
獨畏公嚴明歛手不敢肆濬灤河築長堤郡人德之  
陞副使備兵天津稅監馬堂多爪牙爲民害公至計  
縛之寘諸法

陞陝西叅政督兵神木爲榆林要害西酋沙計素跳梁  
難馭公慎封守簡精銳又捕勦套酋數十級諸部落

畏之不敢犯邊故事兵馬餘糧悉充道臣公費公詫  
曰此孰非地方膏血耶籍記入正餉誓不稍沾餘潤  
丁數歸服闋備兵薊州修車馬戰具甚備清驛遞汰  
冗濫以佐軍興尋乞養歸

官遠事孔棘奉命以叅政兼僉事分巡東寧遂仗劒出  
以死自誓入廣寧宵旦籌畫顧經撫不和西酋內訌  
勢且莫支公不得已具文請告已得允而正月二十  
日大兵渡三岔河矣廣寧官吏皆遁人多勸公西走  
且謂請告之身可以無死公獨語從者吾一日在事  
則一日臣子也若偷生入關何面目見天下士乃作

書與母太淑人楊氏訣以匹馬二僕走松山乞援於  
經畧不得公知必不可爲乃親書一紙令家童持信  
入關其畧曰本道奉命分巡廣寧家有九旬之母絕  
裾出山抵任以來飲食俱廢意圖肅清迅掃仰報君  
父不意天不厭亂三岔失守惟有一死以殉封疆耳  
謹西向叩闕南向拜母自經公畧以明臣節外所有  
隨任家童二名遣還原籍報信誠恐關津阻滯合給  
印批遂整冠束帶再拜以印綬自縊二僕高永高厚  
謂不忍主人獨去無給使令地下者慟哭爭死永遂  
以書付厚抱公屍仰就其綬跪自縊時大兵且迫經

畧命舉火并二屍及公署焚之未及以馬稟給厚厚  
年僅十九有武弁盧科感公德棄家護厚入關事聞  
贈光祿寺卿再贈大理寺卿謚忠節賜祭葬廕一子  
錦衣世百戶立祠高永優卹銀二十兩

時與公同殉者武臣則叅將羅公一貫一人羅公受知  
于巡按御史方震孺從戎伍拔置叅將守西平大兵  
入攻西平一日夜不下砲傷六七千人屍與城平竟不  
能克大兵招降之公大呼曰豈不知羅一貫是好漢  
肯作投降人乎亦豎招降旗大兵怒反覆聚攻城中  
火藥盡公自刎死贈都督同知襲陞三級

兵備何忠愍公廷魁

字汝謙山西大同人萬曆辛丑進士官至遼陽兵備辛酉瀋陽陷死之

公以博學宏辭稱庚子魁鄉薦瓶無儲粟有以居間請者麾去之辛丑成進士授南直涇縣令發奸摘伏老吏不如就琴溪架石梁爲數世利以與邑大紳忤改令寧晉義問彌昭秩滿當遷攀輪塞路去官以後兩城並思召入爲刑部主政治獄平允

癸丑擢歸德郡守郡故囂競難治有豪右張國安借地稅爲名幾成揭竿公授意邑令浹旬就縛時共推定

變才亡何調衛輝復調河南蓋以福藩就封衛輝實  
爲孔道而朱邸建維陽中涓侍衛瓜距新銳又非賢  
守不任彈壓也歷三郡著能聲丙辰擢西寧副使尋  
丁艱去而憾者猶煽飛語中考功法幸得常調降黎  
牟守

辛酉以原官備兵寧海時天變屢徵日光加巨公申請  
防遼云看得天象示異有兆必先近據回鄉口報敵  
自入春以來修備餵馬其思逞於草青馬健之日業  
有其兆矣况敵將清河一帶山路盡行斬斷或畏我  
進兵爲防守之計也或併力撫順爲傾口之策也彼

以乏食而甘爲孤注我以審勢而尚難出奇借火器  
於近邊未必湊手調家丁於九寨尚逸叩閭兼以三  
月欠糧之軍形枯似削半年無料之馬骨立如柴萬  
一餉絕兵興是彼與軍俱敵國內與外皆危幾也本  
道受事月餘毫無裨補察形見影殊加杞憂乞申飭  
城守嚴加戒備區畫兵事與袁經畧多牴牾爭納降  
事舌敝不可挽乃貽書家人曰吾不知死所矣潘陽  
陷同事者爭遣其孥公曰吾不敢爲民望大兵濟河  
請於經畧乘半渡急擊不聽及薄城幸未合請盡銳  
悉禦之又不聽未幾城陷從容歸署西向雲中拜先



靈泣語左右曰吾負若屬其自爲地母我顧也懷印  
徐步自投於井二妾高氏金氏從之婢僕六人一時  
同死事聞贈光祿寺卿再贈大理寺卿謚忠愍廕一  
子賜祭祀昭忠祠

知縣張烈愍公振德

字季修蘇州崑山人以選貢授四川興文知縣長爲諸生有名讀張巡許遠傳輒擊案曰罵賊而死尚汚賊刃我頭豈容賊斫耶其忠義性生慷慨激烈如此

萬曆丙辰謁選除興文知縣縣故九絲蠻地四面皆口密邇苗酋奢崇明窟穴崇明以朝廷徵兵援遼而叛興文當其出押道時爲天啓辛酉八月公方供事蜀關以九月十六夜半還而十七日土把懋龍等反於重慶興文居民不滿百家土壩不踰三尺典史劉承

澤問將若何公曰督率吏民乘城死守事不可爲吾行吾志而已時公兼署長寧縣印二十一日長寧簿徐大禮以騎從來迎公不可則請迎眷屬避之復不可公持兩印巡城意氣如常作書授次子緄曰振德邊令五年千辛萬苦上不得罪於天地朝廷祖宗下不得罪於百姓今欲守而無可守之人欲備而無可備之具惟有手持兩印以身殉國而已二兒若幸得全惟爲善以畢吾未竟之志他無所囑書畢復謂緄曰吾生平讀史至千古難平事絕代有心人未嘗不欷歔流涕而此非予灑淚時也讀聖賢書所學何事

臣爲君死復何恨汝歸語汝兄共圖樹立以報君親  
毋負我忠義家聲可也二十三日平明賊騎數千環  
薄城下公手劒跨馬率弓快迎戰衆寡不敵退集城  
中男女及家人登陴捍禦賊衆擁入公痛哭厲衆巷  
戰死傷殆盡疾馳入署左持兩印右秉七首危坐廳  
事令孺人以下人持一刀環坐後堂積薪坐側賊不  
敢犯日暮賊縱火焚民舍公曰此吾授命時矣起望  
闕叩頭曰臣生不能爲陛下殺賊惟有一死以盡臣  
節今家人舉火遂同孺人錢氏及女淑安淑慶俱自  
刎投火中僕婦蘇氏沈氏長幼同焚死者九人家人

顧美嚴英皆巷戰死明日賊目胡宗祿至火所見公  
鬚髯怒張面色如生兩印在手堅不可取皆愕然曰  
稱忠臣忠臣羅拜而去士民藁葬公於縣南天壇山  
事聞贈光祿寺卿給祭葬立祠廕長子紀錦衣正千  
戶世襲妻女祔祠

新舊蕭蕭姦徒擄竊漢丁動以干計前令悉置不問公  
卽流配窩拐犯僧以清禍源隨招還縣民之被掠者  
三百餘人咨首以金遺公公裂書責其來人拘繫之  
嘗一署宜賓再署長寧在宜賓則採殿木之異材解積  
逋之黔餉在長寧則夙案之株連頓清數年之劇盜

盡得諸所厝施可利百世是時同公殉難者教諭劉公希文華容人

時遼事大壞節鉞大吏無有死綏殉國者而乃得之遐方小吏且舉家以焚天子哀之制曰此以疆圉多故奔潰相仍余欲慘死而施生責以大義必先閔忠而厲節教之事君爾興文縣知縣張振德五年保障撫字心勤三邑賢勞湛恩肌浹屬逆酋之作難數郡風靡遂登陴以授兵孤城斗絕力戰無援盡室自焚瞻茲義烈良軫朕懷易名烈愍峻秩司光致祭歲時立睢陽之廟世官環衛字羽林之孤異數以旌榮哀斯

備於戲生吾所欲矧二十餘口赴義如歸國猶有人  
蓋二百餘年養士之報庶幾精爽尚克顧歆公居官  
清素將死出篋中僅得銀一兩二分與其子緄錢孺  
人長德化知縣春沂之女十三歲時家海上聞有倭  
寇從其母登高樓約曰寇至則自投樓下孺人敬諾  
安坐刺繡自如興文之將陷也孺人與二女皆誓死  
從公故公赴火益決公之婿顧推官咸正後公二十  
餘年死義於南都

巡撫王公三善

字彭伯河南永城人萬曆辛丑進士累官僉都御史  
陷賊而死

授荊州府推官以執法聞選入爲吏部郎數上疏言事  
與臺省抗論不合引疾歸庚申起太常少卿辛酉黔  
事急陞都察院右僉都御史巡撫貴州時蘭酋旣叛  
水西安邦彥起而應之挾安位爲名聚衆十萬以壬  
戌春圍貴陽且十月舊巡撫李檣巡按史永安嬰城  
固守永安與諸將盟作飲血歌見志掘草根煮鼓甲  
俱盡而援師不至



公受命星馳候楚蜀兵援黔迄冬十一月無至者公召諸將謂曰貴陽陷在旦夕吾輩失黔則死法進援則死敵等死耳柰何不以忠義自奮於是令道臣何天麟督兵七千從清水江進爲右部道臣楊世賞督兵萬餘從都勻進爲左部而自與道臣向日升將二萬從中路進當賊鋒人有議臘月不與師者公叱去之兼程而前十二月二日進母猪洞三日次新安是夜賊報至營中驚擾議退兵公曰退則齏粉耳吾以死捍之按兵不動卒無賊四日命劉超爲前鋒抵龍頭營公以身尾之相去不二里聞銃聲衆股栗欲止公

曰前驅當賊必無退者吾當爲後勁遂策馬而前未  
一里劉超捷音至超兵遇先却超下馬斬二人持刀  
斷賊一標賊首阿成最驍勇超與步兵張良俊直前  
斬其首賊遂披靡公統兵繼至大呼齊進奪龍里城  
衆議此地去省會四十里賊必有大兵堵截請量而  
後進公曰此行累數日糧爲必死計不能持久吾初  
至賊不知我虛實宜亟擊勿失策馬先驅賊見公自  
將錯愕出不意亡散奔走

壬戌正月遂乘勝抵貴陽城下城中歡聲如雷迎公入  
城公不可曰賊去未遠軍心未定吾大帥也豈敢卽

安營於南門外坡上設帳大雪中賊聞遁陸廣河外  
且走漢目羅希祿等上訟冤書

公上疏言安國強梗逆我顏行元克未擒當用勦爲撫  
而總督楊述中一意主撫議遂不合公遂決意自將  
以閩十月聚兵六萬渡烏江十一日次黑石賊來逆  
敗之斬部將單弘化令於軍十九日賊悉衆至始出  
十數騎憑東嶺瞰諸壘公下令不俟中營礮聲而出  
者斬乃閉營休士賊漸下山至平地公舉礮率兵擊  
之賊敗走二十三日賊復至敗之如前賊乃柵漆山  
自固以老我師軍中糧乏賊以遊騎絕我樵采諸道

將請退鎮南關公厲聲曰吾有三策聽爾曹自擇一則斬吾首詣賊降一則焚營而遁遁亦當斬吾首懸之西峯頂上示無退志三則惟有力戰耳諸將心動多泣下者齊聲曰爲公死二十七日昧旦諸軍向漆山公朱衣戎冠督戰示必死顧左山頗峻麾左路軍據其顛賊倉皇下柵來爭左山左營定番卒龔鼎發勁弩仆一賊日陣動鼎揮長刀直前死士十餘人繼之兩軍堵牆而進賊大敗死者無筭焚其營明日公下令亟趨大方次草子孔復敗賊斬獲千餘賊不復能軍我兵遂安行渡渭河十一月十九日入大方大

方嶮遠阻絕爲安□千年窟穴前此漢兵未有至者  
公駐宣慰宅遣人誘安位出降欲執之以購邦彥而  
制府忌公功多方撓之公約四川帥李某會師大方  
不至糧盡拔營歸

公駐大方日久邦彥日夜聚兵自益令其黨陳其愚詐  
降公輕信之多與叅贊軍務甲子正月三日發大方  
焚宣慰宅還貴州陳其愚相繼隨行忽傳其愚山後  
遇賊公勒馬回視其愚故縱轡衝公墮地公知有變  
粗帥付家人囑令護持先去卽抽佩刀自刎公罵賊  
不屈賊割其首去副將秦民屏亦死之楊述中回籍

聽勘旣而監軍御史傳宗龍獲陳其愚誅之

公留心武事自家居時凡所見俠客壯士皆籍其名記之後多爲公用得其死力援黔時得邸報不肯發或問故公曰吾正辦兵事何暇及此且朝議戰守紛紜每苦聚訟觀之徒亂人意耳其堅決如此從公而死者同知梁思泰等四十餘人公奏捷時已加公兵部侍郎至是贈尚書廕一子錦衣世千戶

論者或咎公貪功失律乃其解黔圍破賊囤功在西南有不可泯者轉戰深入直抵□巢自戊午以來誰能奮勇不顧如公者乎至以袁經畧與公同論尤爲不

伴夫身失遼而甘同其亡與身復黔而獨蒙其禍天下後世必有能辯之者吾故於公事獨詳序之以附李翰傳張中丞之義焉

明名臣言行錄卷第八十六

總兵杜武壯公松

字成青號鶴林其先崑山人世襲榆林衛積功官  
至都督同知萬曆四十七年沒於陣

公少英偉慷慨負氣善騎射人咸目之曰飛將年二十  
九襲總旗例加副千戶浮沉里中巡撫賈仁元擢守  
漁河自是顯名萬曆二十二年火落赤糾衆將入寧  
塞公率驍騎出密澗直薄營斬首十九級復糾  
套騎吉能入犯定邊鹽池公從總兵麻貴爲前鋒與  
大戰走之擢領鎮兵坐營中軍二十三年八月貴



檄公親將兵出常樂寨與相接爲陣時衆鎮兵道遠未集皆懼公躍馬先登戰十餘合公軍益奮無不一當百扶傷遁去棄所鹵掠萬計十一月論常樂功進實授叅將視事如故二十七年閏四月火落赤等人犯寧夏安定塞花馬池副總兵李崑被圍甚急時公兄桐方移鎮寧夏公計寧去安定遠定邊去安定近不救而陷桐且得罪乃引軍馳赴與大戰殺傷相當亦解安定圍去寧撫楊時寧以奇功上二十八年鐵雷大舉入磚井敗之是歲請告歸三峽別堡

居四年總督李汶與都御史孫維城鄭汝璧交薦詔以  
原官協守延綏東路九月炒忽兒等七酋擁衆寇孤  
山之紅崖先遣精騎禦之 大集公軍繼之再戰斬  
其酋十二奪駝馬鎧仗過當復追舉其二旗炒忽子  
以爭旗中矢死 號哭遁去先是公屢出寨破

不能支每入寨又輒失利去 中畏公異甚比之爲  
狼以其面赭號曰紅狼公至是相戒曰慎無犯紅狼  
公由是不敢窺孤山明年七月詔進右軍署都督僉  
事佩鎮西將軍印鎮守延綏三十四年四月公與火  
落赤大戰於安邊塞敗之事聞告廟行營進公署都

督同知廕一子本衛正千戶世襲仍予銀幣

四十二年秋吉能挾王封不得大舉入寇延綏令東

沙計等圍大柏油堡殺副將孫弘謨復令西火落

赤分犯寧塞而公兄子文煥已爲都督僉事方鎮寧

夏禦却之九月赤謀令寧合犯清水營牽文煥西

援而赤自以所部深入大掠公聞警自嘉嶺歸榆林

將集衆禦之赤聞而懼謂諸曰紅狼且至奈何諸

遂引軍歸棄所獲輜重人畜赤不能止亦遁歸其

爲所憚如此吉能自大柏歸益驕移謾書延綏言

將大攻中路挾講十事延綏大震總督劉敏寬檄公

治兵吉能聞公至遽還令火落赤等迭撓我師十月  
赤等入犯靖邊公開馳赴之至紅柳河赤方半渡擊  
之斬其前鋒遂大敗赤悉奪所掠而還十一月赤等  
復糾衆聚旗汗山一點沙諸處欲臨邊設伏誘公以  
報靖邊之役公諜知之檄西路協守蕭捷等四路兵  
自寧塞守日澗逸出赤後多持大鼓乘夜夾擊之赤  
大驚不知所出遽引衆迎戰公大呼馳之遂却而潰  
追奔至明水湖斬首四十二級班師還寧塞謂諸將  
曰彼雖小挫計必復來宜乘其未定再擊之從間道  
出磚井堡黎明與赤落部遇赤旣畏公又新敗不敢

戰而退赤復集數千騎遮公柳門大小十餘戰左  
部復先奔赤軍顧之亦奔公揮親兵橫擊之搦其皂  
纛衆益不可止遂大破之斬首百七十級死傷無  
筭赤自是遠徙不敢出公自磚井還移降 戊靖邊  
與守臣不合而敏寬顧左公功不得敘久之告歸  
四十六年大兵陷撫順中外大震言官爭薦公以原官  
起山海援遼總兵官已復陷鉄嶺趣召公駐瀋陽總  
遼東兵公益破家募死士二千人及相從蒼頭數千  
人疾馳出關至潞河人聚觀如堵公裹而示之曰松  
不識字武夫惟不學書生貪賄懼死耳衆見其創痕

班班然無不嗟嘆四十七年春天子用輔臣從哲言  
勅經畧楊鎬刻期進兵遂以二月二十日分四路出  
師令公帥總兵王宣趙夢麟叅將龔念遂柴國柱遊  
擊劉建節王詰張泰記楊欽汪海龍楊汝達一軍出  
南方令副使張銓監督經歷左之似贊理以瀋陽爲  
一路從撫順關出公自負宿將輕敵携杻械揚言曰  
我必生致之勿令諸將分功也大兵聞軍出獨憚公  
以一大將之精銳三萬騎應公先是鎬期三月朔諸  
道並進公以先二日三鼓嚴裝出撫順宣與夢麟阻  
之不聽副使銓諷之又不聽撫順拒五嶺百二十里

平旦越五嶺關抵渾河焚尅二柵半渡忽萬餘遮擊  
衛全師爲二車營鎗砲水急擁渡不前公爭山頭駐  
軍而林間伏盡起公血戰突圍自午至酉力竭師殲  
焉公及王宣趙夢麟皆死馬林絲三岔出寨抵二道  
關夜聞公敗軍遂譁旦遇敵至林歛衆以退復追擊  
之死者枕籍僉事潘宗顏通判董爾礪皆死公固與  
李如栢不相下及誓師謬與約曰吾願以頭功讓公  
公喜自負及渡河又訛傳如栢自清河進兵已全勝  
矣公益奮而前遂陷伏中而如栢竟全師還鎬謂公  
貪功輕進致喪師廷臣皆交章雪公寃請誅如栢以

謝公天啓初詔贈公及宣並少保左都督南都再建  
予謚武壯



都督劉忠烈公紱

號省吾南昌人積功官至都督萬曆四十七年沒於陣

父顯公束髮從征所至皆捷癸巳倭陷朝鮮大兵諸路並進倭遁釜山檄公督兵防守全慶又選麗兵精勇萬人令公教習訓練移王子光海君出鎮重地設險阱謹斥堠以禦外侮會樞臣狙於封貢欲撤防東事遂壞乃益募江南水兵議海運分水陸四路合官兵十萬公居西路相機行動是時倭據朝鮮者七年沿海盤踞爲三窟蔚山爲東路清正據之順天爲西路

行長據之望津四川爲中路石曼子據之三路皆阻  
海爲固公率所部居水源攻順天倭寨倭築寨逼海  
公不得達設計誘行長通好單騎候於中途以示不  
疑會部下一倭千總洩其謀行長驚遁公計不就乃  
督諸將奮勇還戰遂大勝斬獲頗衆倭敗入釜營不  
復出

二十七年秋福建都御史金學曾報平秀吉死各倭酋  
業有歸意我師因水陸乘勢夾擊捷音日至倭事始  
結云

播酋楊應龍反檄公督川兵先發官兵五路征討公總

綦江路綦江自東溪入播並峻嶺茂箐楠木山羊簡  
臺等峒素號奇險爲賊首穆炤等盤據公力戰克之  
庚子三月楊朝棟統苗兵數萬分道迎敵鋒甚銳官  
軍夾擊公身自陷陣苗大驚曰劉大刀至矣棟潰圍  
走幾爲我獲初綦江諸苗自分屠城慘戮罪不赦又  
應龍憚公威名冀首挫其鋒屬朝棟悉勁兵間道相  
角曰爾破綦江馳南川盡焚積聚餘無能爲也及朝  
棟僅以身免賊膽落益爲守禦計奔入婁山谷婁山  
關萬峯插天中通一綫官軍從間道攀藤魚貫毀柵  
入

四月朔屯白石應龍身率各苗殊死戰陰令楊珠等抄後山奪關四面合圍都司王芬中流矢死公親勒騎衝堅以遊擊周敦吉守備周以德分兩翼夾擊敗之追奔至養馬城與南川永寧路合連破龍爪海雲險圍壓海龍囤而壘海龍囤賊所倚天險飛鳥騰猿不能踰者時偏沅巡撫江鐸抵任視師督戰益急總督虞公與應龍舊檄無通賊公械其人自明而吳廣以朔三日入崖門關營水牛塘與賊力戰三日却之賊詭令婦人於囤上拜表痛哭云田氏且降復詐爲應龍仰藥死報廣廣輕信按兵不動已覘知田氏詐降

緩攻而所云應龍死乃川兵攻固以火砲擊死所謂  
楊珠也珠驍勇善戰旣死賊痛如失左右手廣覺詐  
益厲兵協攻燒二關奪三山絕賊樵汲八路兵大集  
游龍園下五月十八日始築長圍更番迭攻自是賊  
坐困窮厓矣

時天苦雨將士馳淖中苦戰六月四日天忽開朗五日  
公身先士卒進克土城應龍益迫夜散數千金募死  
士拒戰諸酋皆駭散無應者起提刀自巡壘見四面  
火光燭天傍徨長歎泣語妻子曰吾不能復顧若矣  
詰朝官軍遂登固破大城入應龍倉皇同愛妾二闖

室縊且自焚吳廣獲其子朝棟及妾田雌鳳急覓屍  
出焰中廣中火毒失聲幾絕頃而甦計出師至滅賊  
百十有四日總督露布以聞首敘公功冠軍焉

戊申五月調征雲南恢復三宣六衛又提督陝西兵征  
臨洮火落赤等部裹創百戰兵不挫衄四十年建南  
禦燹爲寇起公督兵往勦斬級三千三百事聞於朝  
坐飛語廢置

戊午遼左難發詔徵天下宿將入衛京師起公都督原  
官抵京疏請諭蜀父老集舊兵大要謂廟廊戰守之  
議未定將之責任未定兵之分布未定難以出關卽

火器兵器馬匹諸色破等械未備各省所調之兵馬未到新召募之兵馬全未訓練亦難以出關若輕發債事張永胤卽前車也况今邊事亦難言矣一聞驚則人情恟恟若敵在目前應事不無過於張皇敵稍退則處堂怡怡竟置之度外而綢繆不無疎於桑土累累數千言奏聞不報

公曾向黎陽王公在晉言蜀兵至始出關蜀兵公父子所習用肯與主帥同患難者也蜀兵未至卽嚴督公行立趨之出戰且預洩師期使先得爲備曰憑你幾路來我只一路去偵知杜松最勇先設伏塞沙斃之

馬林亦尋敗惟公漢入三百餘里連破十餘寨營亦  
堅忽假杜旗幟馳誘之令亟來會戰公啓營而鐵騎  
闌入不復可止公與養子劉招孫俱殲焉鎮江遊擊  
喬一琦身陷重圍力竭自縊衆解救乃投危崖而死  
惟李如栢全師退舍左次而還



武經畧滿武愍公桂

字

其先山東沂州人以軍功隸宣府衛起行伍積功累官拜征西前將軍己巳冬沒於陣贈上柱國太保謚武愍

公有勇力長身黑面弱冠起行伍積功至寧前衛指揮僉事天啓二年大學士孫承宗行邊公與諸將俱入謁承宗見其貌壯之召與語兵事甚悉因檄爲中軍公自持廉無聲色之好與廝養卒同甘苦所部皆樂爲用已而承宗代王在晉爲經畧決策守寧遠使祖大壽移覺華兵修城版築旣具使尤世祿孫諫以兵

三萬人駐守時寧遠孤懸關外與建州接諸將畏惡之孫諫尤怯密賂御史潘雲翼疏移內地承宗怒然亡如何公前白承宗奮請往曰食其食而避其難將焉用臣且安皆得寧土而居之承宗悅復使大壽更築寧遠撤公守之與道臣袁崇煥經度土功招携叛集散亡開屯練兵不半歲迄成巨鎮

三年秋承宗敘關外勞臣援公署總兵官進都指揮使仍管寧前衛事時大兵殺戮遼人益甚值冰膠渡河東歸者踵接於道西駐寧遠俱邀掠之三譴問諜皆爲所得公憤甚言於承宗請討之遂自率兵與副

將尤世祿襲擊之於大凌河斬首四十餘級中矢刃傷者數百人號泣西奔承宗大喜以飲至禮勞之承宗乃自至寧前遣公等進軍深入二百餘里後大兵破覺華島進攻寧遠公與崇煥禦之爲死守計慷慨誓衆曰今孤城援絕欲歸無所正我與公等効命之秋也且彼屢勝而驕目中已無寧遠城堅糧足器械完好攻必不拔求戰不得我從而乘之可以得志衆皆踴躍大兵以衆薄城環攻兩晝夜公悉力拒守及攻城西隅銳甚公與崇煥謀發火器擊之殺傷無算又轉攻南城推板車爲蔽人持斧鑿城乃束薪加脂

以鐵索絕而燒之得稍却又選敢死士數十人夜持火藥焚其戰車遂大敗遁去尸積城下如丘所棄輜重器械不可勝筭捷聞熹宗大喜下詔褒賚崇煥與公等稱公捍禦孤城赤心奮勇厥功甚大令兵部從優陞敘遂授公平遼總兵官都督同知既王之臣代高第爲經畧稱公忠勇爲關外第一良將崇煥以爲掩已勿善也上書盛稱趙率教而刺公之臣亦言崇煥匿率教與公不和願勅崇煥無信讒忌以誤邊事崇煥具疏謝罪心疾公益甚居亡何上疏言寧遠嚴地任將宜慎桂實不能調和諸將若必用桂於寧遠

而欲將士用命非臣之所敢任也上曰桂廉勇素著  
挫敵有功倚任方切旣忤羣情其召還更用他所令  
羣臣議之臣崇煥桂率教去留久之不決乃詔之臣  
崇煥捐忿協力移公鎮守山海佩征將軍印駐劄  
關門節制寧遠錦州前屯大凌四鎮及燕建四鎮仍  
賜劍以重事權

七年春大兵圍錦命公移駐前屯爲聲援公遂引軍而  
東抵笊籬山敵前後截擊兵不得前官軍奮鬪敗之  
殺戮以百數大兵熾公下令不得割級遂稍却我死  
傷者亦數十人公乃令死士間道偵寧遠知城守堅

又頗得勝益鼓而前

樹白龍旗設大帳於灰

山窟籠山首山連山南海爲九營綿亘數十里公撤  
軍入濠少休令尤世威等整火器以待望見城東塵  
起蔽天須臾大兵前來圍城公親督紅旗軍率諸將  
祖大壽等迎之搏戰良久斬首過當彼昇尸焚之雙  
樹堡西公與尤世祿溪入手刃數十騎而公馬亦中  
數矢易馬大呼馳之世威等從山東坡上發西洋大  
炮擊其大營碎之大兵當者皆糜爛 不可勝計

自卯至午前軍鬪不已

固山四人牛鹿三十

人遂大敗撤營去錦州寧遠同日解圍於是崇煥上言十年以來盡天下之兵未嘗敢一當敵今桂等奮勇進鬪所當無前斬名王破堅壘一戰而挫之桂功爲最宜異等錄之乃下詔大發帑金勞諸將士而進公左都督加太子太保

公自創守寧遠益習邊情又多收降人置麾下以恩信結之皆願効死至是彼中嚙指無不知有滿將軍者無何崇煥罷王之臣復來督師又盛推公請仍鎮寧遠節制如故會烈皇立詔從之臣言時西都令邑失爲虎墩兔所逐迫而投其部曲有疑懼不敢從

者之臣與遼東巡撫畢自肅議收之散置諸將部下  
及公至前後又收二千餘人朝議大譁詔之臣且爲  
袁應泰王化貞之續嚴關必危并勅公阿之臣不計  
利害不稱大將於是之臣具疏辨奏詔切責崇禎元  
年之臣令總兵朱梅遣部將陳淮率桑昂兒介所部  
五千人置大興堡檄公集諸鎮散 三千人使劉福  
率之置沙河堡公乃令其酋目於演武場給以牛酒  
賚以布帛厚爲慰諭而遣之安插撫循降人竟無變  
會之臣坐黨逆罷公卒以招降事議召還京師會大  
兵將攻錦州公牒知之檄諸城堡嚴兵爲備而自與



朱梅各帥兵趨松山大兵見我備嚴則引兵襲拱瑰板城鹵之公與梅各選精兵伏大鎮堡邊外親率兵移駐錦州城外軍於野大兵退乃召公還未至大兵復入公整兵禦之再戰大兵却退營高橋松山分兵圍大興堡招桑昂怒罵之發火器逆擊大兵復却公遣人人城獎諭又發火器助沙河堡降人兩城竟堅守不下朱梅亦遣兵襲之於高牆塔山斬獲頗多我軍失之少怒悲毀數堡去

公循至京師廷臣又言邊事孔亟公素爲彼中所憚不宜置閒散之地會虎墩兔數入宣大邊邀賞西北邊

戒嚴大同鎮臣缺廷推公八月復拜征西前將軍以  
原官鎮守大同時大同久恃欵弛備視諸邊尤弱公  
至立覈鎮戍設防徧歷沿邊八路七十二城堡悉却  
諸將餽遺革占役清冒餉明烽堠飭礮弩再月而將  
士凜凜稍知奉法而通政左叅議楊紹震復追論公  
受降人等因言桂本種恐爲插所輕公恚上疏  
辨且請罷優詔不許上旣採羣議起兵部尚書王象  
乾撫插駐大同之陽和插邀索無厭巡撫張宗衡令  
公耀兵以威之插懼而受盟

冬十月大兵入大安口薄京師上有詔趣諸鎮援兵公

遂以所部五千人兼程進時朝廷望公甚迫旦夕責問兵部偵公師期又發帑金二萬待公與宣府將侯世祿至而勞之世祿兵先至再與大兵遇敗而公以十一月十八日至京師駐德勝門下城中大喜立命職方郎丘禾嘉迎勞給萬金檄戶部予餉使遄往援通州聽閤部孫承宗節制而上復有詔留公與袁崇煥犄角大兵來攻公發大砲擊之殺數十人砲息復前公令軍中大砲與城上砲并發得却公以所部降丁奮關公身中二矢部率多死傷大兵亦稍畏公會祖大壽以遼兵蹙之得遂退三日大兵營門外正街

公與大壽合兵禦之砲發死者十二三公與大壽  
追擊大破之上聞公傷使中官齎牢醴慰勞令公饒  
城少休又二日攻城益急令公率家丁乘羅城守當  
是時公軍駐西北大壽兵駐東南京師恃兩將爲固  
循拜公爲武經畧總理諸鎮援兵督宣大兵駐安定  
門公固驍捷敢戰所部降丁頗恣時乘間擾民僞爲  
邊裝入邨落因掠貲以歸公不能問上以承宗言出  
馬世龍於獄使爲將公不悅承宗懼其相軋下教和  
解之公乃止乃用申甫爲副總兵甫所募多市人未  
習戰公軍益傷之夜發矢驚其軍有死者監軍御史

金聲以聞上亦不問亡何公與大軍戰安定門下敗之亡其一貴人已而上逮督師袁崇煥下於理祖大壽以遼東兵走事益急兵部趣公出師公乃請調昌平總兵尤世威爲援許之趣戰益急以十二月十六日進師公以師期已泄遂與黑雲龍孫祖壽麻登雲等以十五日暮進營河口諸將議爲方營公不聽爲長營列河上十七日大兵零騎誘戰發砲殲之已而全隊至宣大兵倉皇不能支遂潰大兵東西擊首尾不能救公與祖壽戰死登雲遁還雲龍爲大兵所得六日始得公尸又三日得祖壽尸兵部以聞大兵退

賜柱國太保蔭一子世都指揮僉事謚武愍

原缺

都督張莊節公可大

字觀甫號扶輿其先德安孝感人世襲南京羽林  
左衛千戶萬曆辛丑武進士官至左軍都督府管  
府事吳橋兵變自縊死謚莊節

歷官浙江都司分守瓜儀貢船被劫於帆山公計擒其  
魁徐少山陞劉河遊擊陽電參將會征黎之役與  
總戎王公鳴鶴用黑番爲嚮導入其洞平之調寧紹  
駐舟山倭再入犯公擊破之於五罩湖於茶山於潭  
頭加副總兵築城立碑居人德之歷南京錦衣衛掌  
堂南京右府僉書管府事提督大教場總理水陸軍



務

鎮守山東兼防海總兵官時爲崇禎元年自三方布置  
議起而登萊爲神京門限主客兵雜處新舊餉兼支  
繁猥無緒公至首定經制汰冗冒水上則立海防左  
海防右并標中三大營爲汛守內地則止留步家丁  
一營馬家丁一營并陸左陸右二營爲城守歲省金  
錢二十萬會裁登萊撫鎮兩臺疏保公暫管登萊協  
守事而開府如故報可自遼土淪喪議者謂恢復必  
先四衛而復四衛必先旅順於是或議扼南關嶺或  
議築長城島公以鹽場口居兩山之間其隘可守外

距木羊城二十餘里內距旅順關十餘里首尾易顧  
更設銳城於黃金山最高頂彼不敢與我爭金州矣  
遂決計城之

高麗貢道舊繇山海關遼陽失後改繇登萊公以麗船  
往來內地奸宄易生請令從覺華島登陸仍繇關門  
入二年妖賊作亂衆至萬餘圍萊陽公擊破之焚其  
六砦

大兵入公率山東兵七千勤王陞都督同知明年還鎮  
四年劉興治叛公遣裨將陳治學等擊斬之大兵攻  
鐵山諸島公擊却之陞右都督其冬改南京左軍都

督府管府事

吳橋兵變破凌縣等六城公提兵會勦巡撫孫元化主撫不聽公遂分城而守城陷公守水城知不可爲解所佩大將虎符授旗鼓吳振姬間道歸山東上之殺其妾陳氏自縊於署之太平樓公季弟可度與仲好鹿徵以公柩及母太夫人繇海抵天津疏聞下部議覆賜贈廕祭葬建祠特祀謚莊節

公長於詩文所述有錦衣衛志等書公弟可仕字文時以字行改字紫淀爲諸生通曉掌故范文貞公在南京延之講防江戰守之策次南樞志一百七十卷家

宮城之側國破後蘊爲兵屯因徙秦淮之南編國朝  
布衣詩一百卷居甚困窮而志不屈後公二十三年  
卒於家

總兵曹公文詔

字

大同人積功至大同總兵崇禎八年戰沒

于真寧詔贈太子少保賜祭葬

初隸馬世龍麾下爲軍鋒崇禎元年府谷民王嘉循反破延安清水堡殺孤山副將李釗六月以公代之嘉循尋陷府谷據其城與官軍屢戰延撫洪承疇進勦賊窮送還縣印退保大小寬平等寨十月二十日再陷清水又陷府谷兵至走之遂渡河西入總兵王國梁遇之誤襲紅衣礮官兵自亂河曲陷嘉循據之檄公副杜文煥往賊堅守官兵絕其餉道會寧寨陷文

煥家破宗人盡殲遂留公圍城而拜表西救兵部調  
保定尤世祿爲山西總兵官以文煥世祿麾下多將  
材自汪士任以下十餘人皆敢戰乃王嘉猷以三千  
人出掠方裕昆敗績於櫻桃鎮又白雄戰歿虎大威  
尤勝龍皆重傷世祿虛張首功塞上意以此威望大  
損明年四月公破河曲嘉猷遁去二十四日由岳陽  
入屯留長子境二十七日從高平之長平取山徑至  
沁水坪上村西南行入陽城北鄉知縣楊鎮原固守  
賊從李丘長灣村而入南山六月初二日嘉猷夜飲  
醉虐其下左右殺之以其首獻公八月以公爲臨洮

總兵公同平陽道郭竹徵追點燈子於河津稷山爲  
秦撫練國事所破渡河入晉公大敗之于桑落鎮又  
敗之于霧露山賊退屯石樓縣之康家山綏德知州  
周士奇守備孫守法伏兵于含峪以降丁賀思賢爲  
導九月十八日守法渡河襲之點燈子出不意裸身  
提刀欲戰思賢識其聲直前砍之乃斃是時練國事  
圍李老柴于中部賊黨郝臨菴劉道江自慶陽來援  
未能卽下會公殺點燈子奏凱歸秦遂與榆林道張  
福臻合兵攻賊誘李老柴生致之一鼓而下中部傳  
老柴磔都市十二月公奉洪承疇檄五路進師勦宜

綏清米四縣之賊大戰敗之追至祁家高梁丑山掃地王授首

五年三月賊紅軍友李都司杜三楊老柴等屯萬人于鎮原之蒲河練國事檄總兵楊嘉謨及副將王性善等扼險設防而承疇率公以臨洮兵三千從鄜州間道來會戰于西濠拔其三屯斬首千級所將卒得杜三楊老柴餘衆南奔奪武安監破華亭攻莊浪公與嘉謨遣都司靳國香游擊曹變蛟馮舉劉成功等追至張麻村大戰賊遁入高山會性善之兵亦至又共追之于咸寧關賊披靡尚有衆數千趙光遠阨陜不



得往漢南由長寧驛赴張家川而公又從隴州至縱  
反間以亂其心賊內自疑剽刃紅軍友官軍從而乘  
之鑿水洛城西大呼摧陷賊走草唐毛山以望官軍  
官軍爭山不得上變蛟躍馬凌其顛將士奮勇砍殺  
寧寨餘賊殲盡給事中呂黃鐘請專任文詔以晉事  
以寧武兵習于逃分其兵三千命公將之七月賊可  
天飛圍合水公東關左光先率衆巷戰公以千八百  
騎往救至花門寺聞礮聲疾馳賊匿精銳山谷中用  
千人來迎且戰且却抵南原伏四起城上譁言曹將  
軍沒矣文詔瞋目持矛左右衝突萬衆殊死戰士望

見氣百倍表裏夾擊賊大敗僵尸蔽野初十日再戰銅川橋文詔身自陷陣衝其中堅賊互相踐籍投崖墜死者無算會楊騏以固原之兵至公與甘肅總兵楊嘉謨寧夏總兵賀虎臣同破賊于甘泉追奔五十里斬首七百八月初八日督師洪承疇次平涼宣言降者勿殺散去數千人追至何家老寨陣斬可天飛李都司二賊白廣恩降

六年正月賊分七大股股萬人或五千人圍孟縣殘忻州窺定襄踐五臺於是公遵奉合勦之旨再渡河入晉率艾萬年李卑殺賊一月五捷太原無復餘孽三

月賊從河內上太行晉撫許鼎臣奏流寇三十萬流  
毒晉地五年就殲者十之五解散者十之三所存西  
賊萬餘遁濟源山中今分東西進勦自可計日奏功  
按巡御史范復粹上幕府軍功斬級三萬六千六百  
有奇公功第一楊嘉謨次之王承恩楊騏又次之無  
何中州告急調公爲援四月解涉縣圍五月襲賊于  
偏店賊敗走墜死嵯谷無算七月改大同總兵初公  
在洪洞與劉御史失懽御史適按豫遂捃拾糾之公  
殺賊太行山中御史相見于懷慶是日蜀帥鄧垓敗  
賴公力戰大破賊甫解甲而御史語言輕重不合公

拂衣起面叱之廷議謂公姑勝而驕量移大同大同尋有兩縣失事文致論戍

八年吳甡撫晉上書追訟其功承疇亦請貰公責其後效帝起爲援勦總兵俾從承疇承疇聞鳳陵有變出秦布置而流賊畢集于秦關中大擾承疇反顧根本四月二十七日次靈寶公從南陽至承疇以賊屯商雒兵至恐先走漢興官軍由潼關入反在賊後乃令公由閩鄉取山徑至雒南商州直搗賊巢仍從山陽鎮安洵安馳入漢中遏其奔逸曰此行也道路回遠將軍甚勞苦吾會集關中兵以待將軍拊其背而遣

之公至商州以五月初六日追賊抵金嶺川賊據險  
出千騎逆戰叅將曹變蛟力闢諸營競起却之斬九  
十級俘十九人變蛟公兄子也賊中聞大小曹將軍  
皆怖懼賊轉圍鳳翔平涼承疇自盤屋郿縣渡河抵  
岐山公至自漢中賊大勢盡向靜寧秦安清水秦州  
間衆且二十萬六月十一日官軍值賊于亂馬川每  
戰失利總兵艾萬年陣沒承疇在邠州憂之不知所  
出公知萬年死拔刀砍地瞋目大罵曰鼠子敢爾卽  
詣承疇請行承疇喜曰非將軍不足辦此賊顧吾兵  
已分無可策應者將軍行吾將由涇陽赴淳化以爲

將軍後勁公乃以三千人自寧州真寧往二十八日  
于真寧湫頭鎮遇賊曹變蛟爲前鋒直前衝賊斬級  
五百有餘乘勝窮追三十里公自率步卒殿後賊伏  
數萬騎四起合圍飛矢蝟集賊不知是公有帳下卒  
被縛呼曰將軍救我賊中叛丁識之曰此曹總兵也  
賊喜圍之益急公力屈不能支手擊殺賊數人轉鬪  
數里拔刀自刎死游擊材官沒者二十餘人承疇爲  
之請卹詔復原官贈太子少保蔭一子外指揮僉事  
祭八壇造墳安葬

明名臣言行錄卷第八十六終